

歷代陵寢備考卷三十六

上海 朱孔陽邵裳氏輯

吳越

錢鏐字具美杭州臨安人也

後改爲安國縣

父寬母水邱氏始誕之夕

鄰人聞其家後舍甲馬聲甚衆已生復有紅光滿室寬怪之將棄於水邱氏之井鏐大母不許因小字婆留而井亦以名鏐祖宙死將葬夜會大風拔樹於野詰旦術者謂鏐父曰此拔樹是天啓也宜以葬已而撫鏐背曰當貴此孫及壯無賴以販鹽爲盜唐僖宗光啓三年以功拜杭州刺史昭宗乾寧二年由開國公進封彭城郡王起師討越州董昌平之拜鎮海鎮東等軍節度使四年賜鐵券恕九死天復二年封越王天祐二年封吳王撫有浙東西十三州梁太祖卽位封吳越王唐莊宗賜玉册更

歷代陵寢備考

卷三十六

一

名所居曰宮殿府曰朝官屬稱臣改元天寶

梁開平二年

寶大

唐同光二年改

費正

天成元年改見十國春秋

長興三年三月庚戌薨年八十一在位四十一年唐主聞赴廢朝七日詔謚武肅

一作忠烈非

仍以王禮葬詔工部

侍郎楊凝式爲碑文

五代史補凝式自以作不逮李瀚多市美酒召瀚代筆

夏四月庚午奉靈

輜殯衣錦軍應順元年正月壬午葬安國縣衣錦鄉茅山之原是年建廟於東府越二年奉真像入廟

按備史唐勅建廟在清泰三年蓋先立廟而後奏允也

皮文通光業

日休子

吳越國武肅王廟碑文曰粵以唐長興三載

壬辰春季薨凋十三莢天下兵馬都元帥尚父守尚書令吳越

國王棄捐官館以是歲明宗皇帝降太常博士段顥定謚議曰

武肅尚書工部侍郎楊凝式撰神道碑文宣翰林待詔張季恭

至吳越書於刊石後二年歲在敦牂天下兵馬元帥嗣吳越王
建廟貌於始封之越國禮與境內樂之罔極孝思也蓋聞神道
設教莫大於郊社嚴禋明德惟馨無逾於祖考孝享是以百代
相襲六籍盛稱報劬勞則天保是徵展欽若則王假是訓况建
除難靜亂之業揚武烈之威名振剛德克敵之風成肅恭之懿
號陳力四紀光奉八朝生爲有土之君薨爲象朝之廟足可唯
旃召畢齷齪桓文聲華永而日月齊簡冊編而古今在矧夫堂
成王構家繼國肥壓璧寶以知來出玉林而嗣位高陽號里無
媿前賢夏屋登山常遵治命爰自邇緇始襲晉墨未除不忍一
日之離遂立千秋之祀金鏐陽邁已成像於吳宮香刻旃檀復
祔神於越國恭惟先天下兵馬都元帥吳越國武肅王殷朝靈
祖仙萼分枝唐代鄭公靈源真派簪纓軒冕禮樂詩書疊慶連

歷代陵寢備考

卷三十六

二

華交光翊葉應勅七世累爵重官羅企一門惟忠及孝其降神
也詎飛蜀國始見殊祥魚躍汾河是生奇表赤光耀室黃氣浮
空石龜隕下於官山 人來歸於寶器其英姿也鳳文龍藻煥
出精神白琥蒼珪琢爲標格加之薛璘整峻謝安風華俯仰可
觀進退爲度慕容德偃日月角光影鏢人李子賢匿犀龜文威
儀鎮俗其辭韻也音容洒落智辨鏗鏘元善抑揚張暢詳雅至
若討論國計談畫兵籌接對使倅撫御將下所謂五湖奔注百
谷 騰玉虹起而雲霧銷金虎嘯而風塵動揣摩勝負赫連勃
口授懷漸掉闔與亡蘇季子舌端有愧其氣度也志高建木量
等大瀛舍垢匿瑕罔知邊際求賢接士無怠寅昏重仁義若邱
山視玉帛如咳唾翹翹車乘惟在得人憧憧往來皆鍾和氣所
以臯皮豹鳥鶴列犀渠咸願殺身用酬大惠變家爲國誠由萬

化生身以德聚民所謂八風從律其英雄也能知否泰善俟雲雷動必有成舉無遺策蛟龍得雨莫測變通鵬鷲出林可知意度其間文武迭用仁義宏敷常平之列戟持矛並能取勝元纒之榻蛇騎虎不覺艱難奄有具區廓成霸業設使庾翼復出必不妄譽以桓溫阮籍重生安敢輕言於廣武其文學也家承儒範世尚素風侍絳紗帳於先生授白綸巾於神女才通夢寐鳳吐是來志在典經龍圖不顧所以博覽七緯精究三元盡得津涯皆昇堂奧其於篇詠尤著工夫思風起而繡段飄言泉洶而金沙見其札翰也花隨腕下星逐毫飛靄若游雲細疑垂露鈎刀向背未饒素肉芝筋點畫方圓高掩崔肥趙瘦就中濡染脾額益見呈露鋒鋷四方仰其神縱一代欽爲墨寶王逸少若見甘避雁行蕭子雲如逢大慚蟬翼其建大功也唐季乾符之末

歷代陵寢備考

卷三十六

三

中和之初海島乍揚天鼈初伏塵飛野馬四郊之壘漸多霧暗騰蛇五賊之機共構其始者王仙芝結獄中土首構禍階雖已誅夷猶殘支黨自此藁林烏合草澤蜂飛僂薄者因是披攘謹厚者亦爲慄悍江南則朱直叛亂於唐山孫端寇孽於安吉西侵宛水東患茗溪郡縣則終日登陴生民則長時伏莽王時郊居葛圃嘉遁茅山方當枕石漱泉尙是衰衣博帶親茲多事慨然究懷顧謂朋友曰丈夫尙須撥亂平姦豈可懷安端坐是日乃奮戎服挂彼儒冠大散家財廣招勇士申令纔舉行伍肅然手仗義旗身當勅敵一月之內二寇殄平靜千里之山川救兩郡之塗炭是王之初立功也其次黃巢來從五嶺直下三衢展梟翅則電布星羅張鯨牙則山連岳峙所遭蹂踐並作塵灰王乃獨領偏師橫行險地旣逢大憝遂設奇兵敵望草木叢林皆

是干矛旌幟我則左右翼陣點化如神當下道奔禽賈餘勇長
蛇封豕使出他疆新市下江保安數邑是王之功也其次彭城
漢宏據南鎮之重地守東越之名區黃巢既犯兩京僖皇乃巡
二蜀漢宏不思奔問使廢貢輸恃險阻於浙河欲覬覦於浙岸
先於漁浦竈口翼張下營蕭山西陵鱗次列砦烽燧交應鼙鼓
相聞時我諸軍實有難色王乃潛趨間道夜濟長江仰告昊天
乞昏朗月當下寒雲布野殺氣凝空楚廟陰兵旁隨霧合晉臣
黑幔闇與山連我師忽震於雷霆彼砦俄驚於魂夢風號獵虎
爭傳破竹之聲陣卷龍蛇競集建瓴之勢賊將般輪不暇漂杵
有餘僅身免以奔歸乃塞門而自守邇後大小百戰首尾四年
方清鏡水之波始有蘭亭之地甲其生聚大布仁慈誅彼渠魁
不煩天討是王之功也次則有薛朗逐出周寶自據朱方南襲

歷代陵寢備考

卷三十六

四

毗陵西侵建業恣其剽掠務在殺傷將乘中國之危擬扼長江
之險王乃命二麾上將期一月報功指其山川授以韜畧蹄轂
並舉水陸兼行曾不旬時討平窟穴裏南宮萬以犀革視以囚
人臬崔慧景於鱗籃彰其叛主是王之功也次則有徐約比是
六合鎮使遠忝三吳郡符玉帛是求徵歛無度長時習戰齊民
因被雕鯨比屋爲軍魯儒亦遭翦刺惟王聞其暴虐奮激神威
發上谷之精兵命下江之賢將授以九天九地之訣傳以訓辭
訓典之規扼斷咽喉清其郊野任約之龍果睡王彌之豹徒飛
食窘朝饑無由撫土計窮宵遁遂至潰圍松陵之烟水重清香
徑之黎元再活是王之功也次則有孫儒恃有數萬兵甲不守
淮南直欲別遷土疆遂奔江左封人民爲糧食墮舍宇爲薪蘇
餓鶻鷺飛揚京口貪狼乳虎踐踏吳門漸逼由拳將窺甯水

王乃張天網於險阻闢地穿於要衝發水犀之驍雄設燧象之奇計青雀摩壘赤兔致師將持久以待之俟勢窮而必取守陣皆哭無食何爲鳴鼓而攻脫身遂去向使不施神畧不振王威則翼翼最靈皆成膏血茫茫勝槩盡作烟煤所謂劬勞爲時廣大及物者是王之功也次則有董庶人始鎮石鎮使牧杭州因破漢宏遂居越土自形成象從織至洪前是王之擐甲執兵左提右挈以致手持旄節身爵王侯旣滅頂於彝倫乃垂涎於神器銅符金匱祥瑞亂與玉璽珠袍妖訛並起王以早同楚畝夙共晉盟書尙緘滕血猶濡劍牋函旁午誘勸交馳諫旣閉於屬垣禍遂成於覆族是時兩河屈強三輔紛紜萬象雖拱於北辰一人不遑於南顧王請奉行天討所統便是國兵不費上供資財不役諸道將帥果見桓元計窘抽玉簪以求生王莽勢窮轉

歷代陵寢備考

卷三十六

五

銅斗而厭勝喉旣春於富父骨復專於會稽滌其故宫焚其法物復我正朔清我寰瀛五石補而天鏡明六合完而地維正是王之功也王以平妖立霸時之業戡亂建蓋世之功律呂官商鏘洋史籍丹青金玉煥爛國華所以僖宗天子仰我文昭瞻我武烈龍光壓壘急使星馳綸綍使藩大王風起尋以耿純試理盧植兼才披錦衣以耀家鄉握圭符而光松梓泊於昭皇飛昇大寶禮遇元勳龍悅居雲鳧忻得藻嘉功賞德金鳳之詔連飛表異旌優玉麟之符遂刻移南徐之藩鎮就錢塘之江山節竦靈犀帳開神虎三千珠甲光爛星辰十二牙旗文生組繡碧幢纒建黃閣又開乃兼鎮於越藩遂對持於漢節中天辰象雖分牛斗之疆夾岸烟嵐映出東西之宅四縣旣食萬戶累加榮載立門赤油羅列山河誓券金字煢煌生祠之蓮豆鏘鏘衣錦之

城隍黠黠而又特逾漢制封我吳王茅分夏社之鄉桐翦周王之手昔也龍蛇起陸蹈湯火以戰爭此際山川出雲見君臣之際會逮夫濟陰王旣傳大寶梁太祖遂應元苞於王不易范張之故情請結秦晉之嘉好恨無殊禮得展異恩於是遣呂望之高風擬山甫之美躅帥尙父統攝三老作帝股肱尙書令總務萬幾爲天喉舌仍頒瑞節復陟高壇建牙兼鎮於揚州分閩遙臨於楚甸尋命兵部尙書姚洎躬持鳳冊遠泛鯨波備周官之典儀封越國之士宇八鸞駟馬耀鏤錫以振鉤膺三節一王秉桓圭而垂元玉及龍德嗣君卽位禮稱伯舅尊曰父師寅敬列光益虔顧命是遣吏部李尙書燕奉持綸誥繚遠湖湘授天下兵馬都元帥洞庭彭蠡漸無不順之臣北狄西戎將有後予之嘆昔韓信對漢高祖曰陛下能將將臣能將兵是知元帥非人

歷代陵寢備考

卷三十六

六

臣之職曹蓋帝王之兵柄推之前代隋煬帝自晉王淮南行臺尙書令爲行軍元帥而無天下之號國朝肅宗皇帝駐蹕靈武因命代宗皇帝自廣平王而爲之德宗皇帝自魯王而爲之梁太祖授九錫後而爲之斯天下元帥之故實也其後龍德帝復命兵部崔侍郎協齋持簡冊浮汎風帆揚往典於明庭促及時而建國奉召康公之命得以專征授唐叔虞之封良由吉夢未久金行運息土德中興莊宗皇帝鵬起并汾龍飛宋汴當宁不逾於旬朔臨軒宣諭於公卿曰吳越國王五十年來常作楮天之柱三千里外每爲捧日之雲今若將致小康實在敬尊元老於是鸞臺進擬麟趾摛詞典瑞獻功琢白圭而冊文燦爛職金供命鎔紫磨而印篆璽瑤重封吳越國王再授天下元帥馬遷十代史內固是絕倫柳詒萬卷書中必無往例其建國也大君

有命明試以功自癸未而至壬辰備戰器而修王道先是中朝名士在野遺人或負笈擔簦來投霸府域折孺爲袴而詣軍門奮袖於嘉納堂中曳裾於靈鈞臺上至此水鏡裁鑒金秤等量並列庭臣皆居省署簪裾列侍文物齊光張伯仁陳宗廟之儀鄭子產獻公侯之禮豈謂離窮者大數莫究者彼蒼俄脫履於具區遽徹縣於正寢金山霧掩誰知帝召王喬玉海波空寶痛神辭李廣况十三州疆場百萬戶黔黎咸長養於恩膏悉生成於化澤淚洒而晴空散雨愁凝而杲日沉雲鳥獸悲哀草木慘怛明宗皇帝宣太常而定謚法詔貳卿而撰誄文鸞輅龍旗贈禮優於鄧禹梓宮黃屋異數等於霍光得謂壽始盡終極榮極貴享九九之仙壽近帝位於一爻感萬萬之人心歆神道於千祀有後如此又何缺焉我天下兵馬元帥吳越王當燕族之多

歷代陵寢備考

卷三十六

七

奇承趙宗之後世嵩衡泰華秀氣俱騰淮濟江河榮光並結是時允主誕我國祥紹經文緯武之基襲積德累仁之業開襟奮臆伏雄傑於周瑜誓衆臨戎統人豪於張袞風儀則懸星溢背紫電揚矚霜雪凝肌魚龍入髮仙應有分貴不可知宋弁聲姿尤閑進退寶融詞氣惟是卑恭加以青雲常在於言談畏日不離於顧盼徐行緩步褚彥回却是趨踰散幘斜簪王文憲味非蘊藉智畧則鮑叔雖矢應乎而來德器則顧和圭璋過機方露遠者大者一剛一柔靜則心照鏡而貌懷氷含和六氣動則火炎山而湯沸海懼懼萬人機變則管葛才高孫吳術妙身文虎豹隱見不常義府戈矛短長迭用三雋才旣爲己任六奇策固是無遺卻歎詩書經綸國計項羽雷電振動兵籌徐睇而莫測金泉旁窺而罔知珠岸詞藻則青霜皓月絡繹彩牋芳草落花

飄揚鏤管織成夢錦散出神霞英變屢奇張融之言信矣凌顏
鏢謝元葉之論宜然札翰則早受義方曾傳掣筆鸞回鵲反氣
勢驚人金錯銀鈎縱橫入木案牘無非墨陣宮室爭耀寶碑崔
宏之本草無光張育之折蒲失色立功則我王初離太學始統
親兵鄭世子方欲平齊汝陽王正思安漢編鄰國侵軼命將曰
李濤僅二萬兵下百里紫圍逼安國涎咏餘杭我王虔奉訓詞
遂昇上將清風受式黃石傳書親蒙韓奕之黃罷躬伏封文之
白虎攻東南而備西北事在機先掩五壘而出三門別馳神算
於是崩摧大陣擒獲萬人道路隘於俘囚山川積於干甲餘敵
作氣既竭方遁於潛我則乘勝追奔又平廣德未出一百里之
境復降五千乘之戎唱凱歌而喜氣連郊整班師而雄風畧地
尋卽大統龍艦遠泛鯨溟巡江陰而收東州入海門而觀北固

歷代陵寢備考

卷三十六

八

彼境遂陳舟楫遠出枝梧我則陳二廣於浪港沙前設三覆於
石碑灣內零陵石灰風起爭投於蛟蜃窟中沁水火棧油燃倏
葬於鯨鯢腹裏一戰而霸二紀無虞寰海具瞻將相迭耀聲光
不顧裴松爲廊廟之人功業升聞段襄居骨鯁之任爰自嗣承
國構績奉王基况當跪箭之初又在寢苦之內芝蘭龍鳳二千
餘口之家風鐵石虎貔二十萬人之軍府誠難撫御豈易輯綏
我王以孝爲模用仁作範無所不可惟言是從嘉惠寵靈供奉
花萼油雲膏雨潤澤闔門此外習武益兵輕刑慎罰德無脛而
遠屆名無翼而遐飛果動大朝繼踵異寵三年之內兩册連封
雙龍之金節齊行四馬之寶車前輾玉佩冠劍見王者之尊崇
織文旂常視國容之貴盛我王因茲顯赫益動孝思無以答先
后之恩無以報昊天德且曰武肅王有大功及天下六名振

寰中庇生民則百萬有餘築城壘僅五十來處豈可不建廟號
不像真容爲星紀之福宮作地戶之神主爰命興武忠直都虞
候姚敬思於馬臻湖畔句踐城中選闔閭形勢之中區得顯敞
高平之基址於是鉞杵俱下眷鍾齊興隱隱雷聲轟轟岳岳振不
十旬而展役布千丈之隆基大梓文楫非自秦山伐得宏梁巨
棟非由漳水漂來雕鐫者王母元圖甃砌者赫連繡石斤揮斧
運削出銀葩水鑿沙磨方成玉礪符元武之嘉兆應神著之吉
辰始乃架險梯虛雲構山砧陰虬迴滄陽馬奔趨虎牙銜而枿
拱連龍脊裏而變廬轉瓊瑤耀壁丹漆明簷鴛鴦之瓦縫界成
芙蓉之塼文印出卽以丙申歲唐清泰三年秋八月十有七日我王
備鹵簿鼓吹車輅旗常北司侍臣南班舊列奉迎眞像而入祠
宮白檀雕出聖容黃金鏤成寶座儀形酷類神彩如生鳳目龍

歷代陵寢備考

卷三十六

九

章顏猶不改垂旒被袞人見興悲禮器則俎豆犧粢軒懸則祝
敵鐘磬後殿罩衣雉服文母賢妃露幔珠屏蝦簾象榻不異昔
時秘寢皆同曩日深宮前則廣廈交陰芳庭對構紫石伏狻猊
之影朱欄交齒齒之光正啓重門並立神將侍衛兵仗矛戟森
然文武官班簪裾蕭列直出甬道千步有餘河枕投醪波通射
的蓮芰遶於水閣桐桂夾於星橋左則迴抱粉廊連延綺棟並
圖曹署名列司存乃至早世勛臣無祿公子皆塑儀像並配薦
羞右則修廡飛甍綠窗丹牖陰兵神馬見雷電而沒風雲明牢
淨廚備粢盛而烹肥膾景物則高山矮桂粉竹金松夾砌名花
連階瑞草烟嵐翳尉便是陰宮雲霧濛籠居然神府我王昔以
致君之業累殄寇戎今立顯考之祠而修孝敬所以天朝繼封
王爵以耀國章金印輝煌丹書赫煜元帥帥天下侯伯拱戴中

朝位冠諸藩勳高列辟卓絕殊猷鴻業懋哉兩地參天設使書
剡州九萬之牋不能盡紀勒華山五千之仞亦恐難窮先業也
詞不容於王椽才匪量於曹斗擬奚斯之頌或恣齷心對豫章
之碑豈合措手但以二紹幕客十載廷臣不求孫綽擅名豈望
楊修絕妙所希編述用答恩知追感先王恭爲銘曰崧高嶙峋
是生哲人上天獅子出澤麒麟麟錢尊殷祖曠允唐臣衣冠表裏
文武經綸廣運將新大盜斯起雁象歛驚鬼毛亂委紫蓋蒙塵
黃金多壘旣敷憲章又裂文軌武肅英王提劍東方龍行雲雨
虎變文章字氣沃酒妖雪歸湯洗滌星紀整飭天常告功狼居
圖形麟閣桐珪聯編茅土續索三道犀幢八朝鳳幄丹券家門
錦衣城郭元帥天下國王具區六瑞琢册三品鑄符尙父四履
尙書萬樞峩峨高壽曦赫霸圖我王奉天爲時而出傳寶應金

歷代陵寢備考

卷三十六

十

繼暉照日國士無雙風華第一削樹平戎夢禾受秩功旣挺世
德又動天龔封二册嗣位三年金應國寶元帥兵權忠無瑕類
孝絕雕鐫未禡墨線乃建清廟臥龍之城會稽之嶠嵐界迴廊
粉明周繚廣霞開重門岳峭瑞玉禮器香檀聖容民之祀主
我之神宗秉翟執籥持磬編鐘然蕭炳熟律奠幣輸琮於穆
祠中煥然陰府五齊恒馨六佾常舞饋薦房蒸歌贖路鼓令子
懿孫光今顯古

莊穆夫人吳氏安國縣 父仲忻浙西觀察判官累贈吏部尙
書夫人閨門整肅祭禮歷封燕晉二國至吳越正德夫人
天寶十二年薨年六十二有子十三人

昭懿夫人陳氏元瓘清泰初薨贈晉國太夫人

又錦南鄉慈智寺西有梁國夫人墳扶風夫人墳韋夫人墳或

云皆武肅王夫人也其名號不具見史冊姑闕疑云

福州大支提山有吳越王紫袍寺僧升椅子舉其領猶拂地兩肩有汗迹

十國春秋拾遺宋徽宗一夕夢武肅王索浙江云以好來朝何故留我我當遣第三子居之覺而與鄭后言之后曰妾夢亦然俄而韋妃報誕卽高宗也越三日臨視戲妃曰酷似浙臉蓋知爲武肅後身也

正德中湖寇竊發許公瓚提兵勦寇計無所出夜忽夢一金甲神從天而降仗劍指揮衆軍從焉寇遂披靡詰旦督軍進發果大捷因詢土人此何神也曰此有故吳越武肅王墓在焉公亟展謁一符夢中所見乃復修其墓而令其裔孫謀名學宮以奉祀云

歷代陵寢備考

卷三十六

十一

宋蘇軾表忠觀碑云趙抃知杭州言故吳越國王錢氏墳廟在錢塘者二十有六在臨安者十有一皆蕪廢不治請以龍山妙因院爲觀使錢氏之孫爲道士曰自然者居之以守其墳廟詔許之改妙因院爲表忠觀自然號通教大師又蘇公有送表忠觀錢道士歸杭詩并引云通教自杭來見予於吳興問觀亦卒工乎曰未也杭人比歲不登莫有助我者余曰異哉杭人重施輕財是不獨爲福田今歲成矣其行乎及還作詩送之先王舊德在民心著令稱忠上意深墮淚行看會祠下挂名爭欲刻碑陰淒涼破屋塵凝坐憔悴雲孫雪滿簪未信諸豪容郭解却從他縣施千金

國朝松江朱彥則綱錢武肅王廟詩云昔日錢王開國地荒祠猶在舊山河強似風流李後主北轅垂淚別宮娥又當年萬弩

射潮迴霸業雄圖亦壯哉興廢莫言千古恨宋家宮闕已蒿萊
別裁集王宏導曾賦錢王祠錢塘亦是與龍地王氣依然據上
游鐵箭舊傳唐歲月聖書曾拜宋春秋江湖出沒三千里風雨
淒涼十四州剩有湖山供廟貌坐看錦繡欲生愁沈歸愚云無
一字一語輕下自是到家

程范村文正錢王廟霸業分星占斗牛當年氣蓋海山秋三千
客自知羅隱四十州空問貫休鐵箭尙藏遺廟在錦衣誰似故
鄉遊殘碑有字還堪讀玉局宏文筆力適沈歸愚云三四本事
作對天然名警

李生甫廣芸吳越武肅王祠迢遙天目勢峻嶒圓木英雄應運
興憶自錦衣榮樹石尙留金券守雲仍恩讐任向遺編辨正朔
憑寬斷碣徵一十四州元傳舍隔江惟有禹王陵

歷代陵寢備考

卷三十六

十二

袁子才枚題武肅王像求觀鐵券不得并序游桃源歸過護國
寺僧洪乘說錢王鐵券藏王村錢亨恂家卽往訪之主人故農
也合家欸客出武肅像與觀云券現在天台縣城中族長文川
公處展卷驚逢王者來如日出海雲爲開垂顛廣顛目閃閃是
人是龍心疑猜良久方知武肅像天生乾坤命世才擲却隲車
便用武越水吳山裁有主黃腰獸至走若磨妖鳥羅平變爲鼠
劍氣能平十四州潮聲尙怯三千帑餘杭美酒千斛賦灑作故
江春水波小名悉憑鄰母喚大風且唱高臺歌八千金尊九十
玉次第分頒與民樂白頭醉倒手親扶赤子遮留馬前伏石鏡
重看舊冕旒山龍更掛新衣服過眼滄桑七百年銅駝石馬盡
寒煙將軍衣錦今何在我亦遺民過惘然相傳鐵券王孫護走
訪方知傳者誤只有農民荷鍤歸手春黃梁留我住想見君王

愛士心家風此日還如故不肯填西湖不肯號皇帝保障生靈
有深意花開陌上送妃歸婆留老矣還娛戲可惜稱臣漢賊前
仲謀畧損風雲氣嗚呼君不見南朝三十六英雄曾無一人肯
受朱三封但聞聲聲苦勸討賊羅江東

錢元瓘字明寶初名傳瓘鏐第七子也長興三年四月改名嗣
立以遺命去國儀用藩鎮法仍遵中朝年號晉天福二年進封
吳越國王仍賜金印玉册如鏐故事六年七月杭州大火燒其
宮室元瓘避之火輒隨發大懼病狂八月辛亥薨於瑤臺院之
綵雲堂年五十五在位十年晉主敕謚文穆命宰相和凝撰神
道碑七年二月癸卯葬於國城龍山之南原八年四月丁卯二
十日立碑石於隧道

碑文曰雲起龍驤化爲侯王鴻駕鳳翥鶻立鷹揚凜然勅氣綽

歷代陵寢備考

卷三十六

十三

爾雄鏐大名之後五世其昌武肅開基奄有吳越恩洽百城名
馳雙闕旣委招懷復專征伐燾土苴茅秉麾仗鉞尙父棄代元
帥承家傳榮襲慶奕葉重葩有典有則去甚去奢威名烜赫事
望光華譚敷縱橫詞泉浩渺曹植忠渥崔儷書少月夕花朝猿
巖雁沼筆落彩牋風清綠篠神傳射訣天富兵鈐龜文日角燕
領虬髯威能伏獸名可愈疴撫衆以惠待士持謙事必有恆政
皆求理扶弱遏強先人後已但見偃風莫聞狎水旱康蒸黎靡
清邊鄙量叟素質德岳彌高禮延耆碩令憲權豪庭趨忠烈府
集英髦講論韜畧獎勸勳勞自靖稱藩益勤述職度布詔命動
遵楷式每陳貢輸常逾萬億表率方隅匡扶社稷功庸罕對渥
澤無倫禮優伯舅位極人臣鎔金鑊玉龜紐龍綸永承當代莫
繼芳塵禁暴戢兵取威定霸方賴控臨忽聞薨謝雲慘長空星

沉永夜號慟軍民涕泗華夏初聞訃奏尋輟視朝深嗟且夷不及松喬倍加贈襚久罷蕭韶君臣分至水陸程遙問傑淪亡英賢繼襲躡躅悲摧無所迨及益務撫循加之周給人情旣安兵威自戢一方肅靜三世輝榮朝宗事大誓志傾城欲光家世上奏聖明願書貞石用顯聲名命玉令人鼓旗良帥德盛功崇文經武緯述莫窮言之無愧庶幾乎萬世千秋人見之而墮淚十國春秋論曰錢氏之王惟武肅有改元事而廟號則史所不載問讀余公綽閩王事跡云永隆王曦年號三年吳越世宗文穆王薨林仁志王氏啓運圖云永隆二年吳越世皇崩子成宗嗣雖二人所紀年歲不同至廟號稱宗則二書脗合似非竟無可據者今兩浙民間猶謂武肅王爲錢太祖豈當日果實稱宗而後漸諱之邪當闕疑以附夏五郭公之例

歷代陵寢備考

卷三十六

十四

又建炎以來朝野雜記云羣臣欲稱光堯廟號成宗者尤哀曰此吳越錢元瓘僞號也是又以成宗爲文穆廟號已不知何據恭穆夫人馬氏安國縣人父綽娶武肅女弟生夫人性聰慧勤於職文穆王年逾三十無子夫人爲之請納諸姬武肅王喜曰我家宗祀幸汝得主之矣天福四年薨年五十葬衣錦軍之慶僊鄉良山村

恭懿夫人吳氏名漢月錢塘人中直指揮使珂女忠懿王蓋其所出也善鼓琴慈惠節儉頗尙黃老之學廣順二年薨年四十四是秋勅葬於慈雲嶺西原明年忠懿王建報恩元教寺以資冥福已又鑄銅像二致奉國金地二尼守志孝思焉

仁惠夫人許氏名新月台州人雅善音律後庭樂部悉命掌焉開運二年薨年四十四

錢宏佐

五代史宋史作佐表忠觀碑作仁佐

字元祐元瓘第六子母許氏天福六年

九月即王位於僊居堂玉册金印皆如元瓘開運四年六月乙卯薨於咸寧院之西堂在位七年年二十八八月漢主勅諡忠獻

表忠觀碑作忠顯

令太常卿張昭撰神道碑文葬於龍山之西南原

夫人杜氏內牙都監昭達之姑早薨

元妃仲氏湖州人寧國節度仁詮女天福八年冬納旋薨葬於國城外之小麥嶺

武林舊事仰妃墓在小麥嶺下

錢宏侗

五代史作侗

字隆道元瓘第七子母魯國夫人鄺氏天福十

二年六月即王位於天册堂猶稱會同

契丹年號

十年十二月內牙

統軍使胡進思等作亂廢王囚於義和院迎俶立之明年遷王於衣錦軍廣順中遷東府俶命東府以官物充王取給西寢之

歷代陵寢備考

卷三十六

十五

後即臥龍山為王置園於上居二十年始薨以王禮葬會稽秦

望山之原諡曰忠遜或曰讓王

紹興府志忠遜王墓在昌源

錢俶字文德初名宏俶元瓘第九子母曰吳氏乾祐元年正月

即王位於天龍堂俶歷漢周襲封如故在位三十五年宋太宗太平興國三年三月入朝五月納土封淮海國王端拱元年春

徙封鄧王八月薨年六十俶既以己丑歲八月二十四日誕生至是復於八月二十四日即世更與文穆王薨日同人皆異之

訃聞宋帝輟朝七日敕中使護喪歸京師追封秦國王諡曰忠懿二年正月丁酉遣使押翰林儀鸞鹵簿鼓吹葬於洛陽縣之

賢相里陶公原

錢氏家乘忠懿葬河南洛 縣賢相里

袁子才枚錢忠懿王墓新昌路旁古墓歛天書忠懿錢王碑更書南京尚寶某爲十世孫德洪題其壙旁隆中窪陷頗似發掘遭赤眉在昔錢王薨逝後宋主恩禮無少哀賜葬洛陽賢相里不聞此地曾輿機或者子孫衣冠葬七百載事難叅稽從來正史與碑碣往往傳聞多異詞崇韜枉哭子儀像安生誤受熊光欺我非成精老桑樹難呼翁仲說是非且題數行書所見郢書燕說存其疑

王妃孫氏名太真錢塘泰寧節度使承祐之姊讀書通七詩魯論大義宋開寶九年王與妃及世子惟濬入覲以賢德順睦夫人加封吳越國王妃是歲歸國薨葬石人嶺下

繼妃俞氏宋太宗時進貢獻頗不貲又有黃妃者常於南屏山雷峯顯元院建塔奉藏佛螺髻髮名黃妃塔後以地產黃皮木

歷代陵寢備考

卷三十六

十六

遂誤以爲黃皮塔俗稱雷峯塔焉忠懿王有建塔記

右吳越自鏐以唐乾寧二年爲鎮海鎮東軍節度使兼有兩浙至宋太平興國三年國除凡五王合八十四年